

Dithero tsa Tirelano mo Kutlwanong

Thero ka Sontaga o o bidiwang Septuagesime, e le ka 05. 02. 2012
11/2012

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 186 – 172/179
2. **Thapelo:** Morena wa rona Jesu Keresete, o re itshepise mo boammaaruring! Lefoko la gago ke la boammaaruri. Amen.
3. Epistolo ka fa thulaganyong ya 2 e kwadilwe mo go 1 Bakorinthe 9:24-27;
Efangele ka fa thulaganyong ya 1 e kwadilwe mo go Matheo 20:1-16a
4. A go ipolelwe tumelo ya bokeresete!
5. Sefela sa 97 – 90/90

6. Thapelo ya mmadi wa thero.

7. Lefoko la thero ka fa thulaganyong ya 4 le kwadilwe mo go Jeremia 9:23-24, le re: "MORENA o buile jaana, a re: 'A Motlhalefi a se ka a ipelefatsa ka botlhale jwa gagwe! A seganka se se ka sa ipoka ka thata ya sona! A mohumi a se ka a ikgodisa ka khumo ya gagwe! Mme yo o ratang go itumisa a a itumise ka go tlhalefela go nkitse, fa e le nna MORENA yo o dirafatsang bopelotlhomogi le katlholo le tshiamo mo lefatsheng; gonne ke kgatlhwa ke dilo tseo.' MORENA o buile jalo." Amen.

8. Thero: Barategi mo Moreneng, go ne go le maswe kwa Jerusalema ka sebaka sa ga Jeremia. Go ne go se na boammaaruri, bopelotlhomogi, le e seng kitso ya Modimo mo lefatsheng. Go ne go se na molao, thokgamo, le e seng tshiamo. Hosea a re: "Ba a rogaka, ba a aka, ba a bolaya, ba a utswa, ba a akafala, ba thuba matlo; mme molato wa polao o tlhatlaganye le molato wa polao," Hos. 4:2. Jeremia a re: "Kana morafe wa me ke masilo a a sa nkitseng; ke bana ba ba boelele, ga ba tlhaloganye sepe. Ba tlhalefetse go dira bosula, mme ga ba itse go dira tse di siameng ... Ba gagamatsa diteme tsa bone jaaka bora; ba busa ka maaka mo lefatsheng, e seng ka boammaaruri; ba tswa bosuleng, ba ya bosuleng jo bongwe, mme nna ga ba nkitse. ... Boago jwa gago bo mo gare ga bolotsana; ba gana ka bolotsana go nkitse, go bua MORENA," Jer. 4:22; 9:3.6. Ba ne ba dirisa botlhale jwa bone, thata le dithuo tsa bone go leofa, le go dira bosula. Re ka re: Jeremia o a re itse, o tshela le rona kajeno, ke motho wa ga etsho.

Ke fa ga tlhaga Lefoko la thero la Modimo go tsoseletsa ba kwa Jerusalema. Fela jalo ke Lefoko la Modimo le le ikaelelang go tsoseletsa le rona, le go re thusa, rona ba kajeno, le re: "MORENA yo o dirafatsang bopelotlhomogi le katlholo le tshiamo mo lefatsheng, gonne ke kgatlhwa ke dilo tseo.' Morena o buile jalo." Lefoko leo ga le ikaelele go re bolelela gore Modimo o batla go galaletsa bosilo, bokoa, le khumanego, nyaya, le tsona ga di thuse sepe. Mme Modimo o rata go re gakolola gore re gopole sentle gore tsotlhe tse re nang natso ke neo, ke kabelo. O a batla gore re gopole gore tse re nang natso di tswa kae. A re iketleng, re ikakanye sentle, re lemoge gore go na le se le sengwe fela se se thusang. Ke go itse Morena.

Ke go itse gore go boifa Modimo ke tshimologo ya botlhale. Botlhe ba na le tlhaloganyo e ntle, ba ba dirang ka fa kitsong eo. Go boifa Modimo ke tshimologo ya botlhale, go itse Moitshepi wa Iseraele ke tlhaloganyo. A re se ka ra lebala Modiri wa rona, mme re mo
05. 02. 2012 / ka Sontaga o o bidiwang Septuagesime

leboge, re se iteboge. Lo a bona gore botlhale ka bojona bo siame. Le boganka bo a batlega, le khumo ka boyona e siame. Re abetswe tse re nang natso, mongwe le mongwe fa gare ga rona. Tse re di abetsweng ke Modimo ga di nyatsege. Fela fa re simolola go iteboga, le go itumisa, le go itlotla, le go ikgodisa ka tsona, re nyatsa ba bangwe ka ntlha ya tse re nang natso, re a tlola, re dira bosula. Fa ke re: Ke botoka go feta ba bangwe ka ntlha ya thata ya me, ke botoka ka ntlha ya dithuo tsa me, ka ntlha ya botlhale jwa me, ke lebala Modiri wa batho botlhe, Motlhodi yo o ntlhodileng mmogo le dibopiwa tse dingwe, yo o re abetseng mmele, mowa, matlho, ditsebe, ditokololo tsotlhe, tlhaloganyo le maikutlo otlhe, yo o sa ntseng a di boloka. Ke fa ke lebala Moabedi wa tsotlhe, e bong wa diaparo, ditlhako, dijo, dino, ntlo, lelapa, mohumagadi, bana, masimo, wa dithuo le dithoto tsotlhe.

Fa ke gopola Modiri wa me, ke tla tlogela go ikgodisa, ke tla simolola go ikokobetsa, go itshwara ka tshwanelo fa pele ga Modimo o o Boitshepo, gonne ke tla ipolela gore bontle jwa me bo tlhaga mo go ene fela, le tlotlego ya me le moriti wa rona o tswa mo go ene. Modiri wa rona, Moabedi wa dineo tsotlhe ke Modimo o o se nang tshimologo, le e seng bokhutlo, ke o o busang botshelo jwa rona, o busa le ba re ba ratang, o busa le mo godimo ga baagi botlhe ba lefatshe la rona. A re gopoleng jalo gore re mo itse, re mo amogele. Morena a re: “Yo o ratang go itumisa a a itumise ka go tlhalefela go nkitse, fa e le nna MORENA yo o dirafatsang bopelotlhomogi le katlholo le tshiamo mo lefatsheng; gonne ke kgatlhwa ke dilo tseo.’ MORENA o buile jalo.” Ke go reng, fa go twe: Go itse le go tlhaloganya Morena? Ke go mo ikanya, le go mmoifa, le go mo rata. Go diragala jang? A re ithuteng Lefoko la gagwe ka metlha, re bue le ene mo thapelong, re kopane le ba bangwe ba ba mo ratang, re botse dipotso, re supetse le ba bangwe tsela, re ba bolelele tse re di ithutileng mo Moreneng. Fa re sa itse Modimo wa rona, re ka mo rata jang? Go rata le go itse Modimo ke go reng? Ke gore re ineele mo thateng ya ona, re o ikanye bogolo go dilo tsotlhe, bogolo go go ikanya, bogolo go go ikanya batho ba bangwe, re o ikanye bogolo go tsotlhe tse re ka di itseng.

Go tlhaloganya le go rata Modimo ke go ineela mo thateng ya ona, re mo letlelele go re goga le botlhale jwa rona, le boganka jwa rona, le thata ya rona, le khumo ya rona, re kope mo go ona ka bopelokgale le ka boikanyo, jaaka bana ba ba rategang ba kopa mo go rraabo yo o rategang, re re: Morena, re tshegofatse ka dikabelo tsa rona, re di dirise mo leineng la gago gore o tumiswe, leina la gago le itshepisiwe, puso ya gago e tle, thato ya gago e diragale mo lefatsheng jaaka kwa legodimong. Go tlhaloganya le go itse Modimo ke gore re tlhaloganye, re gopole gore re dibopiwa tsa ona, le gore re baleofi ba ba latlhegileng, ba khumanego e kgolo, le gore re tshele ka bopelotlhomogi jwa ona fela, le gore re tlhoka tshiamo ya ona. Ee, ba ga etsho, go ntse jalo. Fa lo rata go tlhaloganya le go itse Morena, lo mphelegetse go ya kwa Betleheme, lo tsamaye le nna kwa Golegotha, re khubame teng ka fa tlase ga sefapaano sa ga Jesu, re bule dipelo tsa rona, re ipobole maleo a rona, re amogele kgomotso le boitumelo jwa boitshwarelo mo leineng la ga Jesu, re di amogele ka tebogo, re lebogele go ema mo katlholong, re phologe teng, re tsene mo botshelong jo bo sa khutleng ka Jesu Keresete, Morena le Mopholosi wa rona. Amen.

9. Thapelo: Morena, Modimo, Rara, re lebogela Lefoko la gago. Re a leboga, ka o re ratile mo go kalo, wa roma Morwao yo o tsetsweng a le esi, wa mo romela mo nameng ya rona gore a re golole mo dithateng tsa lefifi. Tiisa tumelo ya rona gore re go sale morago ka thokgamo, ka boammaaruri, re tle re pholosiwe ka Jesu Keresete, Morena le Mopholosi wa rona. Amen. Thapelo ya Morena: Rara wa rona yo o mo legodimong ...

10. Sefela sa 84 – 78/81

**A kagiso ya Modimo e e fetang tlhaloganyo yotlhe e boloke dipelo tsa rona le maikutlo
a rona mo go Keresete Jesu, Morena, Morepholosi. Amen.**

Thero eno e kwadilwe ke K. G. Tiedemann, ka ngwaga wa 2006.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.